

Helsedirektoratet  
Pb. 7000 St. Olavs plass  
0130 Oslo

06.02.2017

*Sunnmøre Regionråd IKS er regionråd for 19 kommunar på Sunnmøre og i Romsdal med nærare 150 000 innbyggjarar. Medlemskommunane er Giske, Haram, Hareid, Herøy, Norddal, Sande, Sandøy, Skodje, Stordal, Stranda, Sula, Sykkylven, Ulstein, Vanylven, Vestnes, Volda, Ørsta, Ørskog og Ålesund.*

*Sunnmøre Regionråd Sunnmøre skal bidra til ei positiv utvikling i medlemskommunane og i regionen samla.*

### **Høyringsfråsegn frå Sunnmøre Regionråd IKS på forslag til Nasjonal faglig retningslinje for kompetanse og kvalitet i nyfødttintensivavdelinger (dykkar saksnummer 16/16933)**

I forslaget til retningslinje ligg det anbefaling om at det kun skal vere eit sjukehus i kvar helseregion som skal behandle barn som er født før veke 28.

Sunnmøre Regionråd er kjent med vedtaket frå 30.11.2016 i Helse Midt-Norge om at barn født før 26. veke skal behandlast ved St. Olavs Hospital i Trondheim. Barn født mellom 26. og 28. veke skulle framleis behandlast ved Ålesund sjukehus.

Vedtaket om flytting av dei tidlegaste fødte til Trondheim har skapt bekymring for neonatalavdelinga si framtid ved Ålesund sjukehus. Ein valde å tru på forsikringane som blei gitt om at dette ikkje ville få dramatiske følgjer for tilbodet i Ålesund. Dersom anbefalingane i høyringa no blir vedteke, betyr det at innbyggjarane i Møre og Romsdal vil få eit kvalitativt dårlegare tilbod. Det handlar om ei alvorleg svekking av tilbodet til ei svært sårbar pasientgruppe.

Forslaget vil bety at Ålesund sjukehus ikkje lenger skal behandle barn født før veke 28 og andre alvorlege sjuke nyfødte som krev intensivbehandling. Dette vil medføre stor variasjon i tilbodet i vår helseregion. Tilbodet til dei som ikkje bor i nærleiken til St. Olavs Hospital i Trondheim vil bli urovekkande svekka. Sentraliseringa av tilbodet legg ikkje til rette for ei behandling som omfattar og tek omsyn til familiane som bor langt unna St. Olavs Hospital. Nettopp i disse tilfella og i handsaminga av dei er det viktig at familiane i størst mogles grad kan halde saman, og ikkje bli påført vanskar i høve til familielogistikken.

På sikt vil det føre til at Ålesund sjukehus vil miste verdifull kompetanse. Den kompetansen som er der i dag er dokumenterbart svært god, fagmiljøet med stor kunnskap og erfaring er bygt opp gjennom mange år. Når intensivpasientane skal behandlast sentralt, vil det bli vanskeleg å oppretthalde kompetansen andre stadar i helseregionen.

**Det Helsedirektoratet her legg opp til er dramatisk for fagmiljøet på neonatalavdelinga ved Ålesund sjukehus. Sunnmøre Regionråd vil oppmode alle parti på Stortinget, og Mørebenken spesielt, om å gå imot ei slik sentralisering som det her vert lagt opp til.**

Med venleg helsing  
Sunnmøre Regionråd IKS

Jan Ove Tryggestad  
styreleiar

Jan Kåre Aurdal  
dagleg leiar

Kopi: Helse- og omsorgsministeren  
Stortinget ved partigruppene  
Mørebenken på Stortinget  
Helse Midt-Norge ved styret og adm. dir.  
Helse Møre og Romsdal ved styret og adm. dir.